

兩

浙

輶

軒

錄

兩浙輶軒錄卷二十五

陸 秋 余文儀 金 性 張元觀 湯萼聯

俞 成 孫貽武 何廷模 程兆選 方 穎

張雲錦 沈炳與 葉詩 梁國治 桂 浦

張朝綱 吳 鴻 陳鴻寶 柯一勝 陳遇堯

俞 經 周鳳岐 施養浩 汪孟鋗 汪仲鈴

吳慶章 傅學沆 姜炳璋 陶章煥 戴聖芳

鄭虎文 葉佩蓀 蔡 琦 孔繼祥 陳 淚

朱履端

兩浙輶軒錄卷二十五

督學使者阮元訂

陸

秩字賓之號抑齋仁和人堵孫嘉穎弟乾隆己未進士改庶吉士歷官工科給事中著抑齋詩文集八

卷

黃模曰抑齋天姿英異過目不忘詞宋高華援筆立就年十一補弟子員雍正己酉以五經舉于鄉乾隆丁巳考按中書已未成進士擢二甲第一與兄嘉穎先後同列清班一則沈酣精粹一則博大昌明時人稱爲二難能詩善書不肯貌襲古人亦不刻意一家興到筆隨動有奇氣

張琴

元音墜微茫孤桐向誰理危襟遲月明焚香窺化始希夷無聲初泠泠太古水空傳鍾子期獨識絃中旨

白雲山房

卜築依靈鷲軒楹在翠微竹聲圍石几僧影到柴扉白髮人真澹青山願未違一枝如可借欲息漢陰機

余文儀

字叔子諸暨人籍曾孫懋杞子乾隆丁巳進士官至刑部尚書著嘉樹樓集

紹興府志文儀歷中外二十餘年在內自刑曹郎至司寇在外自福寧守至閩撫皆未嘗他徙于刑名尤所慎重而閩事最詳練在西曹兼總辦秋審以平反得敘至百餘次任閩臬時臺北生番入內地戕民計抵賊巢殲殺無數

予告後杜門却掃日手一編無異老諸生

郡齋雜詠

分關天險界羊腸道是山鄉亦水鄉海面紋生魚吐墨巒頭春暖麝行香散衙侵早宜官憲賽社聲歡識歲康自笑醉翁空有意未能垂記媿甘棠

金

性字雨叔號海任仁和人虞弟乾隆壬戌會試殿試皆第一人授修撰累官禮部左侍郎入祀鄉賢祠

落葉集

行狀署曰公少精見虞禹鑄問學尤淹貫史事乾隆七

殿試第一人及第授修撰典甲子順東鄉試散館復第一年會試第一人授修撰累官禮部左侍郎入祀鄉賢祠擢資善堂左庶子侍講學士壬申癸酉迭典江西山西

上

鄉試都學文錄丁丑在

書房行走公言養正之地殫竭微忱用資啟導不易膺

斯任也先後侍書十七年自孝友大端至言動威儀之

節罔弗盡言題詠皆寓言納箴性詹事督學江西轉內

閣學士晉禮部左侍郎告歸主講敷文書院年八十一

卒公在都時捐金醵資創仁錢會館於虎坊橋東部署

周備至今鄉

士接止如歸

詞科餘話仁和金甡兩叔孝感令長孺第六弟也穿

穴諸經時有創解詩宗韓杜駢體得南宋二李之遺

卓文君印

錢刀總被土花侵鑄就琴心賣賦金畱客正宜鈴酒券緘情  
曾與寄愁吟文園寂寞遺書少漢壘摧殘眢井深一片王孫  
春草綠臨邛誰向壁邊尋

鄱陽舟中

放棹別芝山鄱陽水程好湖平本無際洲渚列碁道條條憑  
界破斷續互縈繞正教帆葉卸長見繚繩裊守風旣無患驚

浪亦殊少夾舟多曲岸被徑半豐草疎花綴其間姿致良窈  
窈聞聲不可見平楚隱羣鳥此地絕林棲水宿幸相保灘餘  
螺蚌蛻映日閃雜寶小物有光華猶能勝枯槁篷窗隨賞眺  
興寄轉綿渺隔洲望湖外歷歷檣竿表洲尾入重湖逢迎方  
未了烟波乍離合水陸總環抱吾因與委蛇詩境得幽討

餘干雨後得順風戲作

江行盡日雨濛濛不雨何緣又反風爲掩蓬窗防漏濕頓教  
老眼看書窮卷終每訝程偏滯帆挂仍餘悶未空自笑征途  
底心性試尋消遣黑甜中

新年雜詠題辭

回首辭家十載餘舊鄉風土夢華胥卷中重認新年景却認  
初來占籍居

同年李誠齋

允惟

司馬觀海圖

寄身天地一浮萍官海風波亦飽經千仞岡頭定心石聞根  
那復驅雷霆

由來激水是危磯但幸蛟螭窟宅稀著脚總輸平地穩驚魂  
還記怒濤飛

鮑新喻贈桂花有五出六出者作詩志異

探奇桂海志難詳金粟光踰四照長五粒細摩松蓋影六銖  
輕襲月宮裳雪梅尙憶爭春信薈蕪曾聞掩衆香嘉兆燕山  
元有數更占仙萼一枝芳

桂花并有七出者再賦一首

七襄雲錦記飛梭翦刻霓裳花樣多閨節每浮天地數餘音  
還助律同和秋宵斗正香初滿人日蓂開瓣少訛射策佇香

穿扎手高凌蟾窟渡銀河

朱履端

字端叔號俊谷桐鄉拔貢乾隆戊午舉人王戌進士授庶吉士改兵部職方司主事陳鴻壽曰俊谷先生工詩文詞曲善畫近徐青藤官部曹洞悉利弊更不放獫丁內艱歸終養老父遂不出晚

年移居嘉興梅會里築南園著有樸山吟稿

鍊舟寓居示殷生

還往金陀近一年松廊竹屋共畱連酒邊索我新題咏花底邀君脆管絃偶訪舊家寒月幌閒尋蕭寺上湖船嬉春度臘兼消夏只欠秋窗對榻眠

汪伯子園林

園樹成陰綠幾層主人開逕集吟朋花前共飲三升酒橋畔相攜五尺藤兄弟清宵連襟被家鄉舊事話篝燈少年還往知多少此會從今却未曾

張元觀

字孽上號叫齋永嘉人乾隆甲子順天舉人官刑部主事

遊煙雨樓

樓在水雲中舟行面面通更無山礙目最愛月當空雨濕鐘聲冷煙雨塔影紅此方自名勝莫謾說甌東

湯萼

聯字繼芳號水南仁和人乾隆乙丑進士官編修

周嘉猷曰水南習清書散館一等記名以御史用辛未卒于京邸年甫三十  
一詩清麗秀婉洵足鼓吹休明官翰林時今大司馬朱石君先生昆弟皆孰贊爲弟子享年不永存稿無幾時論惜之

雨中偕王蘇門赴圓明園

極目濃陰壓遠岡溟濛烟裏色青蒼風來萬壑樹聲滿雨到一天雲氣涼路滑石痕添細漲林疎燈影漏微光對牀剪燭西窗話根觸還餘舊日狂

次韻送陸禹三九秋南歸

楓林葉老傲霜餘整理歸船半載書冀北秋風驚曉鴈江南  
清夢憶鱸魚寒潭月冷停燒處古徑雲橫著屐初去去不須  
愁遠別君才未許竟潛居

西風瑟瑟顛南枝極目歸途征馬遲指點寒山迷遠色安排  
清景入新詩還家不減看雲興掃徑應畱買菊資珍重相期  
無別語驅壇端合倩君持

俞成

字亞田號雲客臨安人乾隆乙丑進士官臺閣道著塞外詩鈔

雪後山澗閒步

遠翁寂寂久無聞却戀深山似舊羣雪與老人頭比色風來  
春水面成文草根有信纔離土石竇何心偶出雲正訝充厨  
長物少澗邊一夜有喬芹

忘吾有引

僕近善忘作詩纔閣筆已不能成誦蘇子云今我亦忘吾是殆真能相忘者因自號忘吾記以詩

坐忘非顏子心忘豈莊叟余老而善忘萬事竟何有今日所作詩記前已失後更追溯從前一字能記否自笑無心人故應少我偶久飽塞外塵不識湖邊柳吾今已忘吾高臥日穿牖小童催飯熟喚醒一伸肘

偶題

未能卻粒亦飧霞但是逢山認我家塞外閒如僧打坐天邊遠憶客浮槎春來凍地希生草月入空齋獨聽笳爲報故侯今老矣更無心種舊時瓜

老去光陰空復淹愁來書籍并慵拈藏身好學龜頭縮失手

誰令蛇足添久客擬成風土記憫農猶切雨雲占

時望雨

夜來

篋笥何顛倒明日山厨斷米鹽

孫貽武字紹衣歸安人乾隆乙丑進士

吳越王

鳳舞龍飛地脉優挺生人傑說婆留湖廻龕赭三千弩地擁  
金湯十四州承寵樹皆披錦繡稱藩臣自息戈矛櫛風沐雨  
辛勤甚圓木驚眠老未休

何廷模

字獻葵號西舫仁和人乾隆丁卯順天舉人官海州知州

袁枚墓誌銘略曰君諱廷模中丁卯順天鄉試知如臯縣遷牧高郵再遷海州丁母憂歸服闋不起終於如臯君聽彊詳審頗饒幹略常愛余所撰州縣心書手抄以去莊官時試而行之所到豪暴屏跡胥役肅然如臯素稱難治君初臨授課者麻起一二年後訟庭如水以其嚴訪冒辟疆故陞登水明樓與紳士咏歌其間愛其風俗之醇遂卜宅焉君性瀟灑在江草小住輒來山中佐余疏流泉尋花竹登天風閣看江相約如張弛做事結鄰

而居蕭然有

出世之想

隨園詩話老友何獻葵刺史喜談詩而不輕作常云詩無生趣如木馬泥龍徒增人厭昔住隨園得梅子吧騎落地輕七字卒亦懷於成章也其長子春巢工填詞今年獻葵亡春巢乞余志慕祖近作見示才四首他如湖邊客到花先笑樹裏僧歸路半陰閒雲未必忘舒卷流水何曾管是非兩足而車閒架樹日斜耕犧穩駛人皆佳句也

秦淮感舊

十年不作白門遊忽把孤帆卸石頭聞說舊人都不在春風愁上十三樓

迢迢一水遠通江郎去潮來妾倚窗羨煞載郎船上漿隨波來去總雙雙

千金亭

空亭千古對平坡野渡斜陽獨客過莫怪無人畱一飯報恩

人少受恩多

賭釣叟

萍開風起水生紋一葉飄然泛夕曛魚在綠波竿在手船頭閒坐看秋雲

程兆選

字子俊一字定山永康人開業幼子乾隆丁卯舉人甲戌會試登明通榜授奉化敎諭陞西華知縣歷吳縣南匯陽

山著古雪集

題李大然先生種山亭圖

先生諱崇質官比部審夢人授以種山之訣者因顏於亭

我聞三山屹立瀛海中下無根蒂如飄蓬靈芽倒插斷鼈背倏忽離合衝天風先生夢得種山訣劙雲謀向庭前隙盤根不受五丁斬老幹猶傳巨靈劈蜿蜒洞壑何巘崎孤峰倚煙雨騰蛟嶼夜灑神漿灌石脈琪花瑤草紛歲變柱笏亭中致森爽臥看排雲石筍長畫圓咫尺幻蓬萊一曲琴彈衆山響君

不聞仙人煮石持作糧又不聞初平叱石跳爲羊但使種山  
山可倒不須日羅太倉米

菊叟吟畱別余楓溪先生

先生諸暨人晚客朝皮種菊數百本自號菊叟壬申余將

南歸賦此題別

先生舊傍蘿邨住宛委山前幾朝暮垂老西風臥北平廿年  
不喚耶溪渡南皮卜築清且幽種花滿屋花光浮魏紫姚黃  
百不愛蕭然獨占人間秋逸興豪情近無有瀟灑高風追五  
柳依稀紅葉憶楓溪管領黃花稱菊叟枝枝繞榻花作團紅  
燈白髮爭斑爛幾曲狂歌花欲舞耳根颯颯霜楓寒先生徑  
醉花猶醒欹枕花間夢清冷不知涼月照高眠夢回兩袖堆  
花影花底樽前奈樂何青山一髮悲蹉跎子規夜夜叫霜月  
徒爾歸夢迷幽蘿我來三度長安道雨打槐花秋又老相逢

燕市幾悲歌清詩磊落貽芳草卽今買舟歸去來先生亦擬  
辭燕臺鞭絲帽影匆匆別何時一笑重銜孟世事花開復花  
落人生聚首還離索明年此日醉霜秋天涯兩地黃花約

蝴蝶花戲作

暖風吹夢迷窗紗夢中蝶翅風中斜搖空蕩影春魂醉幻骨  
蛻作籬根花是蝶是花無不可覺來依舊花前坐拈花一笑  
證三生前生蝶是花前我

茌平早發

四更漸漚雨作泥五更脣膊鷄亂啼披衣跨馬夢未醒野曠  
月黑行人稀西風激激卓馬耳濕雲壓樹天爲低塚狐嘯風  
鶴鶲叫路迷不知東復西雲飛片片歸何處隨風灑作春山  
露依舊山花十里香一鞭又裏斜陽去

津門別余楓溪先生

譜得春愁欲斷魂。紅燈小板醉梨雲。江南剩有吳娘曲。暮雨瀟瀟不忍聞。

小築鵝泉格外幽。霜籬分得幾枝秋。無端又負黃花約。不共先生插滿頭。

燕南一棹又江南。行盡先生夢裏山。此去楓橋應繫艇。到時先訪釣魚灣。

方

躁字遜，一號雪屏，又號白岳。

朱方鵝泉，山樵石門人。著雪屏詩存，序署曰：雪屏方君其詩絕去町畦。

成秀逸頗得元和大歷諸人遺響，下亦不失爲石湖釣

南至於天目觀，雲錢塘觀，潮天都觀。

躁諸篇筆力沈雄，又將追踪乎少陵。

鮑廷博曰：先生著有白岳樵吟，舟車漫與等集，舟覆上

海，片楮不存。晚年手稿，自收拾多散落，交遊間蘭紙綻，十一耳。名日詩存。

南野堂筆記 方蘭坡處士之尊人雪屏先生兼長詩畫著雪屏詩存絕去畦町獨標性靈如移居東郭簡友云得游征塵已隔年傍村水竹話清緣莫嫌東野無家具若過南州有榻懸酒熟鄰翁能餉榾詩或稚子解分編草前愁說游燕夜扁馬蒙裘朔雪天詠白鷗云素書欲達海天長落盡蘆花見故鄉萬古龍沙飛漢月一時客賢滿吳霜遠歸薦北懷兄弟到及江南正稱梁猶有舊盟鶯鶯在依依寒夢伴瀟湘伍大夫祠云荒祠猶傍閑城薄日東門弔古情人去蕭中畱物氣客來花裏聽簫聲一身恩怨分吳楚兩國存亡繫死生畢竟五湖歸計好怒濤枉自跨長鯨聞笛云晚來聞笛不勝嗟客舍春寒正憶家手種玉梅三兩樹莫教歸大已無花自書懷歸草云平生汗漫廿年遊閩海春還燕蔚秋每望東南淵西北故鄉河止一并州富春道中云烟村雲塢晚冥冥雙屐登臨路舊經風景不殊吾易老看山重過謝公亭他句如釣臺云一覺帝鄉夢千秋世外心存苟云老無乃如此酒佳有感云金盞交游如隔世老歸風景似他鄉

晚登虞山

絕磽秋有聲寒城落暉影夕陽返前林巒杳然暝霜鐘時

一聞寂寞發深省青春慨悽擲白日不我永襟期幾曾閒晚  
來惜佳景歸路不逢人空林縉風冷獨鶴何處還寥寥碧天  
迴

趙北口雪

林壑氣閉藏雪霰時霏霏餓鴉掠江驛寒豹嗥破扉此地接  
燕趙古情空是非惟於騁目間游子心依依何似江南山老  
柳搖漁磯舊酒不解顏吳綿思敝衣客行淹歲月逐逐奔塵  
畿薄暝北風厲作態如花飛闌梅遜索笑我夢先春歸

金山僧舍淪中冷泉作茗飲

山僧舉瘦瓢夜入老蛟窟老蛟寒不眠欲吞波上月蛟月兩  
掀翻一吸入瓶盃要客淪真茶石鼎火初活松籟流香林竹  
煙散金刹清風生兩腋洗滌存孤潔奕奕精神珊瑚換凡

骨心如無盡燈內照恒不滅

虎邱花市歌

東風解意吹晴郊知我出游攜酒瓢山塘小市雜花放紫裝  
素豔開香芍栽培便過馬塍手娟妙不數吳宮腰老嬌節物  
逐時到肯放酒懷成鬱陶黃蜂掉尾鶯語哢逆鼻氤氳好風  
送花師壓攢早相喚一聲聲破紅闌夢滿鏡新粧顧影笑駢  
枝低颯盤鴉重茅簷綺閣總無分買簪不計兒家貧粉圓香  
陣太狼藉人間別有蘇臺春日日看花起我早心與游絲共  
繚繞靜女懷春爲春醉詩翁惜花被花惱擬將舊曲續花游  
賣花人家四時好

采石磯望月

夜色江聲裏登臨病眼開天垂列宿迴雲抱一輪來光冷魚

龍夢宵征鴻鴈哀揮杯吟不得千載謫仙才

天目山看雲

絕壁勢全俛猿狹愁攀緣老僧導我上舉足心悄悄怪藤藉  
引手一躍空中懸心知此一墮渺乎入寒煙陽崖轉暗谷曲  
折蛇鳥穿置身若天半方知躡山巔雲氣莽鬱勃膚寸周廻  
旋吞吐益歎雙圓顧紛纏綿俄如人馬來冠蓋擁而前朱衣  
蒼水佩寶玦珊瑚鞭忽然如窮餓鶴衣聳寒肩轉瞬復如初  
裴東殊翩翩倏爾爲老翁鬚然化嬪娟鬚眉近可覩粉黛遙  
相憐忽如衛霍第丹青逼中天臺榭何崔巍忽變爲原田忽  
如山鬼醜忽如湘娥妍靈鳳或翔翥神虬或蟠翥森然天風  
起散去何處邊纏見衆峯出一一浮青蓮詭異駭心目恍惚  
言難詮還疑心是雲幻化亦偶然

次韻周穆門湖上雨中作

雲移湖上山雨暗西陵樹釣渚落花深僧攔且畱住情境生  
靜緣眺聽愜心遇蓑笠煙際漁相送孤舟去前山霧色來濕  
翠看無數

天都峯觀瀑

在山不知奇峯巒失背向在山不知高咫尺隨俛仰一出雲  
中嶺始覺神益王厓壁森開張舉目非一狀高低三十六一  
一展妙相殷雷鑿空礀飛流下疊嶂白霓天際來其源不可  
量寒聲徹巖壑百里勢一放胸中萬斛塵及此可滌蕩

賦

累累如珠攢不開相依隨處惹談哈肥因人病支牀久餓爲  
衣從質庫來景畧言中名已博仲容禪裏子初胎別能一誦

阿男賦老我憐渠小有才

張雲錦

字龍威號鐵珊瑚又號藝舫  
平湖閑子生著蘭玉堂集

宋文藻曰龍威與禹徵君樊榭唱和又工長短句樊榭集有書柘湖張龍威長短句後二絕句云踪跡江湖燕尾船一回相見一流連新詞合付兜娘唱可惜紅牙久我然樂笑翁今不可同蘭題五闋隔清才薛家鏡子序昏後懷絕何人喚夜来自注云龍威有和子續樂府補題五闋其天香賦薛鏡云粉妝休塵塵輕不染識政夜來名字深有感於予懷也

葉迎坡陸紝齋鮑咸吉諸君招集南莊探梅

一掉荒寒路幾經殷勤梅信報園丁人來淺水綠邊挾花問夕陽紅處亭昔酒香仍消酩酊春懷淡欲入空冥試燈節後應前放待折橫枝向膽瓶

宿小有天園

畫勞夜以寧茲獨殊恒寢面山設匡牀浮翠擁藤枕池光忽

明幃林端月高引叢篁發清奏新涼霍煩疚情得神彌恬悅

接華胥軒

沈炳與

字繹炳號權齋歸安貢生炳震弟著水經注集釋  
詞科掌錄歸安沈炳震難弟曰

炳與繹施工詩著有補正水經

鮑廷博曰水經注正誤原本於乾隆癸巳浙江中丞採進遺書總錄稱其書據黃尚曾朱謀譙兩家加以考訂  
其經文錯簡據胡渭禹貢錯指改正之注中所引與原文大異者悉取原書附注于本文之下其封建先後地名互異及郡邑沿革分合之類則取史記西漢志表及諸史參以一統志與地諸書訂其謬缺焉

采桑行

桑柘陰陰啼看火誰家少婦雙眉鎖攜筐不耐五更寒雨霽  
風鬟立道左長條欲挽愁無力柔枝方剪氣已竭歸來問蠶  
蠶正飢持刀切葉無已時飼蠶未罷兒更啼喂兒飼蠶心力  
疲辛勤曉夜始三眠山頭桑紫潔且圓剝繭縹絲聲未絕催

科吏已來門前

葉

詩字正始號持伯歸安諸生

陳焯

曰持伯

性耽吟詠獨絕

於時先

刻有玉洞吟稿

乾

隆戊戌年

五十有四

始自刪定

弗措齋集

統計古近體

三百三十有奇

篇

爲五卷自序之

招衡若飲

昨夜新霜入君愁我亦愁移來三徑菊貯作一庭秋絲竹經  
年廢雞豚過社畱莫辭勤秉燭相顧白盈頭

弁山尋左丞公石林故址

不識西巖路逢人問石林危亭無鬢鬚落日一登臨依舊泉  
鳴玉何年地布金今積善寺公之書院其旁爲玉洞是身同泛梗空繫故園

心

與諸子泛畫溪

竹葉藏春鴨鳴梅花挂月邨青谿三百曲一曲一銷魂復有南  
朝寺歸然劫外存主人已去舍過客每停軒州今清果寺梁江刺史錢道故宅

若溪春興次釋情畫韻

漾舟從此去春漲五湖通到處身無著緣流趣不窮杏花山  
店雨楊柳板橋風好是王摩詰詩中與畫中

歸雲菴次吳白雪韻

高士一瓢何處老僧雙樹爲家千載孤山相望入門先問梅  
華

剝啄更無人惱跏趺偏愛僧閑室中長物何有惟有白雲半

閒

梁國治字階平號瑞峯又號豐山會稽人乾隆戊辰進士及第第一人官至東閣大學士諡文定

紹興府志國治性孝友童年失母十七喪父與兄國泰同月日生故終身不稱鴉事孀嫂如母顛沛之中不廢所學所至名士如歸公退論文見之者如對山林高逸晚秉樞要從遊益廣渢穆中自有涇渭恬淡不名一錢篤故人誼貧賤交終身不忘詩文

典瞻風致書法深得唐人精韻  
鳬亭詩話余遊嶺南時梁文定公爲東湖觀察好吟詩無日不聯吟酬和嘗同過肇慶七星岩抗葦浦已先有七古一篇畱題岩寺余亦賦七言長句文定云杭作似學少陵君作別昌黎也吾當仿李供奉另樹一幟其篇中如手招三辰引鳳皇云云醉肖供奉叶屬爲人溫厚和平而作詩喜用險韻嘗言韻險意纔新句纔健嘗與余晚晚賦聯句用二十一韻韻已連押訶詫兩韻又思押乍怕二韻躊躇良久不能就第沈吟曰花氣入簾深余應聲曰竹露滴衣乍危憊老樹聲可怕文定拍案歎賞誦之不已

### 過觀音巖

石壁立水外風濤浩洶洶何年巨靈劈幻此金蓮湧豁豁幽竇液瀝垂乳漚飛空上危梯萬象羅森聳澄潭空心顏倒景羣山拱江帆日暮搖回首蒼烟重一聲清磬鳴上界香雲

擁遊七星巖

七星巖石嵯峨浮空一氣青蒼摩上涵太古之風烟下澄萬頃之湖波珠衡玉斗天心落翠黛千尋照城郭巨靈開鑿始何年朵朵芙蓉新秀削昔聞羣帝朝太情天神媛笑玉女迎來此謫集千觴行前騎麒麟後長鯨鳴鐘交鼓吹竽笙僊音縹渺隔天上至今好鳥傳其聲初向雲關訪靈笈洞口惟容一人入須臾摩礪圓廬高石髓淋漓滴猶濕靈景何窈冥元精乍噓吸呀然竅穴潛陰風金闢玉籥嵌玲瓏山僧東炬照危壁霄然電燭開雙瞳宛延翠氣遞迤青紅飛梁跨接風雲交通玉文石記鐫歲月豁爽抉北迷西東殊形詭狀不可悉僧言下有虬龍宮此龍含霧靜螭蟠崕霄一線光明天白雲

片片都輕舉石人如花琢龍女頗黎寶樹車渠葉淨界分明  
聞佛語僧言此是璇璣臺火齊瓊瑤千玫瑰清霄縞皓延素  
月映空萬里霜華皚我聽僧言意未足直上天門散遙矚手  
招三辰引鳳凰銀河開流溢戶旁乘凌清氣臨洋洋仙風吹  
落天花香三山五嶺鬱何蒼蒼遊心冥漠歸雲低昂仙都佛  
國事難記七星何乃傳荒唐人間莫辨支機石天上迴瞻白  
玉堂

平定城樓天衢閣成詩以紀之

飛閣浮空接漢槎冠山濃翠挹晨霞關河榆柳連三月烟火  
樓臺出萬家幾度嚴城籌保障偶從賢守話桑麻蓬瀛天際  
塵難到指點人寰路未賒

桂

溥初名庸字學中後改今名字岳中號潔泉又號院齋慈谿人乾隆戊辰進士官德陽知縣

袁鈞曰桂瀟爲芳子著詩甚多有柑亭集長安舊草

蓼花

樓草

西征

集

漱餘

亭集

宮節

退餘

草

歸中

遺稿

陳焯曰桂瀟又有

西苑

草子

丑合

鈔

### 新城

古邑當雲棧層巒列女牆兩京此戶牖千古扼河湟城邑餘芳草泉聲冷夕陽莫愁登險峻早晚度平岡

蘭州雜詩用工部秦州雜詩韻

列檻長城近茫茫指顧間袤延連地軸迤邐枕天關秦漢山河鑿旌旗日月環長看飲馬窟塹絕阻那顏

策馬行西郭臨風上驛亭黃沙千里盡白雪半樓青屏翰思前略何津指客星開樽一披豁扶醉到郊坰

擗土遂成屋連間有幾家狂飈驚入牖爛雨濕穿沙收晚三秋粟寒遲六月瓜別無風物萃乍見藏誠花種來西圃地多產者

郭抱天河曲城迎北斗低塞垣深列障秦谷舊封泥譙鼓風光近樓臺夕照西

聖動爛絕域擊柝靜霜墜

張朝綱

字拜熙號冠霞烏程人乾隆丙子順天舉人著冠霞偶存集

陳焯曰先生與予家同里世交焯幼時常見之舉京兆試後未幾歿今令子定邦秀才出示手稿前有辛酉座主趙青藜序畧云其詩氣清而神健謂質而味厚在王孟韋柳間蓋詩家正派也卷中如蠶桑吟鄉村四首頗得幽風甫田大田遺意而搜黃河一篇則上下古今激昂慷慨不徒作者又將溥題云辛酉之秋予典試浙閣得張子拜賦卷輒手不置以五經領溢列副榜余心惋焉甲子丁卯張子再捷浙閣而皆不及額其遇可謂窮矣今觀張子之詩何其冲淡而和粹也讀其詩知其人張子之性情於是乎覘矣

橫沼

近在憐橫渚春風水一灣虹橋高出屋雉堞遠連山花暖共遊罷月明相與還亦知人去盡鷗夢綠楊間

吳

鴻字頽雲號雲巖仁和人乾隆丁卯解元辛未進士

及第第一人授修撰歷官侍講湖南廣東學政杭州府志吳鴻工制藝士無遠近無有不誦其文者授

修撰充講官好獎掖後進與廣東湖南學政文風不振

年未四十而卒官至翰林侍讀端謹和易風

度凝然前輩多期以公輔未竟其用朝野惜之

隨園詩話吾鄉吳修撰督學湖南王午科湖南主試者

爲錢公辛楣陝西王公偉人諸生山闈後各以闈卷呈

吳吳所最賞者爲丁甡丁正心張德安石鴻翥陳聖情

五人曰此五卷不售吾此後不復論文矣榜發日吳招

客共飲使人走探俄而抄榜來自第六名至末只取聖

清一人吳芳皇莫釋未幾五魁報至則四生已各冠其

經如聯珠然吳大喜過望一時省下傳爲佳話先是陳

太常兆菴在都中以書賀吳云今科楚南得人必盛蓋

預知吳錢王三公之能知文能拔士也吳因首倡一詩

一時和者三十餘人後甲辰三月余遊匡廬丁君宰星

子爲僕夫役作主人相

與序述前事彼此慨然

梧門詩話吳侍讀雲巖先生辛未以第一人入詞館才

名大噪官十年而沒聞先生歿之日方酬飲大醉就寢

題明家入故鄉則已化去是夕有夢翰林署中騎導阿

殿云吳狀元赴士地任者閩縣葉教龍學士觀國爲先

過半卅年心憶我從頭之句故葉學士哭侍讀詩有七

十如今真過半重拈詩句念衰遲之句殆亦識也  
題吳手札後云墓前定有聰明樹世上曾無堅固林用  
意切

合

丹霞寺

濛濛遠山合嵐氣明如晦客過僧不知閉關白雲內

登端州試院樓望七星巖作

振衣凌丹樓氣引星辰上翠然莽蒼間崖壁屹相向云是北  
斗魁精靈落炎瘴削特無寸膚參差非一狀怒如熊虎蹲逸  
似鷹隼放乍疑闇闔開肅穆排雲仗又如羽衣客星冠禮眞  
相巖竈聞中空結構訝奇名攫此數畝地樹作一城墮端州  
富山骨刻斲煩巧匠眞宰不可彫萬古乃無恙疾雷殷空谷  
滃雲搏巨浪倏忽霽景清宛與諸天傍我家山水窟見山發  
遐唱突兀眼已驚回薄神彌王徑欲捫參并終須傲禽尙呼

吸苟可通得句力相抗

陳鴻寶

字寶所仁和人乾隆辛未舉人中書官工科掌印給事中詩話寶所工詩吐屬娟秀自長安分手不相見者

已二十四年昨於汪玉岑處見其過河莊比律二首孫

見亭詩話寶所工詩吐屬娟秀自長安分手不相見者

已二十四年昨於汪玉岑處見其過河莊比律二首孫

過可莊訪汪玉岑

十年阻面惜心朋歸計竟蹉跎未能近水誅茅輸破早歛門  
看竹記吾曾生涯漫指營巢燕氣味何如退院僧乘興自今  
來往熟春波一櫂入西泠

消游大好續前賢手掬參寥一勺泉長日鬪茶松院雨春山  
燒笋佛厨烟無邊樂事歸吟筆有分行窩著散仙我亦忘機  
鷗鳥伴段家橋外水如天

柯一騰

字蘭坪以字行號策甫仁和人乾隆辛未進士官戶部郎中著策園詩鈔

朱鼎曰業師柯策甫先生官戶曹十年卒己丁外艱歸  
逾年卒于家世業儒與兄帝夔先生皆以詩文鳴抵京  
名益噪諸名宿往來贈答無虛日旣卒家貧子幼  
存稿散失已盡茲從符竹窗家所存小冊錄之

直沽

孤城遠與白波齊樹擁津門落照低盡日帆擣風向背夾河  
楊柳水東西天連尺五黃圖舊海上春三碧草萋耆老尙知  
山碣石誰教故蹟久沉迷

西溪訪袁石羽時寓張氏園

獨石橋西水一邨居人多傍寓公園溪行欲盡竹不已秋到  
未深蟲正喧風裏敗蘆藏鴨艇門前臥柳結魚樊平生虛有  
林泉興此事於今亦讓袁

荅陳仲璠陳自號九華山人

故人爲訊舊生涯食指于今幾倍加將老漸知情是儂長貧

竟以客爲家青袍未忍干三事赤脚還期踏九華聞道山中  
頻乞米愁君殮盡五溪花

雪後過西溪

雪消古路足幽尋風送寒香引客心臘月溪山行處獨梅花  
世界入來深微茫煙外開茅舍格磔聲中起水禽清賞却宜  
終日坐嫩晴天氣午陰陰

揚州贈胡徵仕

小住近清明春帆忽遠征潮聲落瓜步草色入蕪城洛社題  
襟侶紅橋載酒迎極知烟水外風雨過江情

舍弟南歸有寄

關河涼重客衣輕燈下裘棉送遠行黃葉滿山秋易老暮雲  
無際鴈孤征鄉鄰歲歉多寒餓骨肉年來半死生傳語天涯

苦相憶數行空札若爲情

同顧念青之寶坻

潞河東望策輕車百里蒼茫問古渠海上遺民金大定關門  
流水魏黃初浮杯綠蟻三重酒入饌銀刀二十魚欲與孫公  
補談苑海龍王宅劫灰餘

曹州久旱得雨作詩

羯鼓敲鑼久未停喧喧入夜滿城醒那辭辛苦趨込種已省  
流亡得小寧早市應聞陳穀賤高原及見晚禾青遙知太守

同民樂第一須開喜雨亭

陳遇堯

字臯如號秋坪海寧人乾隆壬申進士著古梅軒詩鈔

朱文藻曰陳遇堯古梅集詩鈔又謂之秋坪詩鈔集中分編曰洛遊草嵩遊草似其幕遊處也

東阿曉發

綠楊枝外霧濛濛路轉平蕪一逕通空翠濕衣涼似雨不知  
身在亂山中

轆轤嶺

徑窄盤盤髻道危簇簇梯雲迷秦棧北天盡潁陽西壁面千  
尋削關前萬木低時清寧特險閒殺一丸泥

宿少林寺

入雲不覺遠徑與羊腸通更隨轆轤轉遙數六六峯落日猶  
照耀近寺光朦朧微聞林端磬尙疑烟際鐘暝色恐行客  
盤路將窮山僧導我前細火穿蒙茸解鞍得初地人馬俱從  
谷靜荷龍象力險虞虎豹叢塵心忽蕭曠罕賴吹寒空情夢  
亦同趣長指浮邱翁

折船自南渡塵緣已能了至今面壁影十步却飛鳥立雪久

無人掌羅樹長好五乳浮空青三花擁白曉我來雪初晴襯  
被苔不蚤捫蘿拊其背月出風裏裏凜冷聲似玉霜輕薄於

縞殘碑讀未暇明發待幽討

俞

經

字醉六號約園又號抱山鄞人乾隆王申舉人官義烏敎諭有約園詩稿

蓬山清話醉六中年始學詩時同里李房山工詩醉六心慕之欲得其傳適喪偶遂娶房山女翁婿年齒相差

實不遠也

讀外曾祖董與子公詩集

金玉持身號世賢名高不但著詩篇漢皇愛少臣偏老齊國吹竽客挾絃親不知貧真是孝外高祖司農公諱守謙名著復社歿後家計日蹙太夫人在堂公竭歷奉養嘗於除夕大雪中負書贊錢盛具春盤爲壽太夫人不知也其除夕詩有云年來貧畏老親知能傳世亦由天阨窮士品於斯見時命無須代喟然

西湖卽事

十里周遭失舊蹊秋湖寒綠漸平堤故人門巷蕭蕭樹夜半  
月明山鳥啼

野興

一片平林一帶山石橋通處有禪關沙寒旅鴈銜蘆至日暮  
山僧杖竹還秋思渙忘隨水遠浮生大抵讓雲閒羈棲亦有  
堪娛事寵辱無由到此間

小閣

小閣人愁坐幽窗晚特開暑清憐夜好雲淡覺秋來綠綺閒  
時榻青燈醉後杯是誰驚寂寢疏雨過庭槐

鴉鳴

鴉鳴村路白月落店燈青短睡無酣味奇寒得飽經平沙浮  
迷樹破暉入孤星况瘁從初壯悽然聽鐸鈴

周鳳岐

字西翔號泊莊永嘉人乾隆  
隆壬申舉人官海州知州

夜寒有感

萬里書生舊擇冠三年遊跡傍長安錦衣驕馬自春色紙閣  
蘆簾又歲寒塞北淒風砧杵急江南歸夢水雲寬亦思城下  
堪投鈎慙愧王孫一飯難

施養浩

字靜波號茗柯又號西髯錢塘人乾隆  
癸酉舉人官榮經知縣著出塞入塞詩

碧谿詩話茗柯工書畫客京師爲羣公所重既得官甫  
抵任坐前在郡王府中敎書聽從人代爲求書發巴里  
坤力贍罪開渠築堡三年之中具有勞績邊  
恩回籍余館汪氏振綺堂時適逢茗柯塞外歸來把臂劇談  
賓眉皓然神氣奕奕手摹大士像一軸云是塞外所見  
石本誓願生還當摹萬本遍傳宇內此軸施供恨山門  
外辨利

院中

臨漪亭啖菱角

坐列溪堂午夢涼堆盤青紫薦時芳經過暑雨腰常折老向

秋風角有芭種傍蓮徑宜泛艇採荷芡寶佐飛觴西冷此日  
迎涼處喚取鄰舟得飽嘗

過鄒地

山腰營窟職蒼茫環抱東西驛路長一片太平耕牧地春來  
到處野桃香

邊碑

雪封煙鎖迴難攀卓立貞珉鎮此山集古欲增金石錄搜奇  
端自漢唐還銀鈎勢作迴戈勁紫蘚紋疑戰血殷堪笑聞僧  
能好事強將頑礪擬斑爛敦煌太守雲中裴岑將郡卒五月人謀附王青建祠以誌萬世云原木酒沒今西門外廟僧立石殿階陋劣可笑雍正九年大將軍齊郎附以南山達坂陡峻不能運車輶乃相度山形開鑿以通之山巔得唐碑係貞觀十四年伐高昌國麌文泰左屯衛將軍姜行本勒石紀文碑亭

進嘉峪關

幽詩風景見窮邊寒谷生春藉力田勝國僅聞呼瓦刺

天家直欲圓神迹邇裘君長今安在戎馬書生事偶然出塞

等閑歌入塞

皇恩恆恤俟三年

到坤之次年卽奉  
恩旨俟滿三年再奏

煙際飛甍四照明年來每飯想崕嶧勞人舊識長城窟噩夢  
新離細柳營坡老堤邊客泛艇潘郎賦裏好稱觥小樓筆硯  
安排就欲譜西征萬里程

過臨清關

路逢關吏如逢虎不踞深山踞水府搜人筐籃索人錢束筍  
帆檣齊駐艤閘河此去是初程暑月行人苦似烹津口畱難  
秋水洞空嗟白髮倚閭情

彭家口離夏鎮三十餘里一名十字河有活沙最礙舟

行

紫燕窺魚蝶戀莎瓜華豆莢滿荒坡柳根犁繩山根緯惆悵  
舟行十字河

汪孟鋗字康古號厚石秀水人乾  
隆丙戌進士官禮部主事

十字河守淺

客心爭歲晚如鳥思歸策行行到淺地束手無如何言下南  
陽閘急惄可輕過問途子已經猶有十字河遠山秋水發常  
年漫坡陀沙土隨以下墳塞生旋渦司牧盍量度爲民掘田  
科一舉手之力所濟豈不多

東蘿石

登盤新筍何須肉倒甕清醪差勝茶我家一榦木芍藥要待

君來纔著花

送拓坡之陽山

曉君豈識炎荒路秋色催人迫難駐江湖亦是尋常溝名區  
絕景來相求君家阿兄落窮邑儒生吏事故不習初心邂逅  
尹龍溪縣齋紙筆從誰給賢令山頭好讀書望君倘作清宵  
立竹身杏葉暗枕榔沙中蟹戶蟹作糧潮雞啼過陽山陽廻  
看來處心恐惶綽有妙句非思鄉能寫灘水聲抑揚迷離瘴  
霧看方防澹薄霜花此未涼投竿要發磯頭興同聲可有區  
劉應連州所領廣州分借君如椽修志乘

友人南歸作家書

封罷閒封淚暗彈夜窗梅雨逼燈寒到頭剩有平安在信筆  
方知慰藉難好友多情煩再索癡兒解事定爭看詩成亦擬

郵筒付得句從來勝得官

東蔣莘舍人

層城一道碾車埃自怪連朝去復回矮屋終教償苦趣直廬  
那許溫蠶材忽傳諸子升階喜頓舒吾生習坎哀同學如今  
原不賤也憐都過少年來

除書三十七人同妙選真令冀北空科目由來名士盛鑒衡  
況值主文公鳳巢閣便羣稱瑞竭坐宮還未脫窮愁悵詩成  
難出手對花誰似省郎工

夜紡女

一絲長續夜長一絲短催夜短窗隙風窺無與伴低頭欲理  
遠愁斷十指凍皴紡聲急一把費將無限力油燈前盡但成  
滴龍頭有粟食已空晨炊未備無青銅急須攜取入市中金

雞鳴嘵斷更鼓喚起夫婿啼兒女

春米鋪

九月穀在場家家杵臼將春聲近遠相和應強半無食爲人忙知衣不過膝臘身高下趁徐疾自分爲傭寧惜力汗流浹背未遑息酬勞珍重主情厚提壺爲買前村酒家中妻子方呻飢乞得糠粃歸自負

北行偶述

五更夢醒馬啞啞輕車早發不暇脂十里廿里炊烟遲客到但奉黍作糜問客歲暮行何之邳徐水鄉方苦飢村婦賣兒如賣畜青銅三百拋骨肉村童拾糞如拾金炕熒寒火衝突船挾鄉逐戶官給賑全生免作道旁璉昨秋西浙等被災大有幸逢今歲閏伏閑

天子時乘龍春省德意流南東此邦臘雪亦霑足看取處處  
歌發豐

舉舉獨行寒可畏殘月曉風太無謂四上春官氣竭衰道逢  
過客名自諱老大無聞空丈夫資糧艱辛笑僕奴薄田賣盡  
舊學廢日覺秋霜生鬢髮今夕何夕歲云徂椒盤自頌酒半  
並

一車三馬十二蹄長鞭一舉步整齊脚夫夜店酣肉酒六時  
蓬底醉夢迷弱小妻孥老翁嫗噭噭家中羣待哺呼倡作使  
苦槽兒一擲梟盧全不顧騰騰大車自北下又手停鞭問車  
價牙行扣炮利幾多何況糞土揮金何明日無錢從客借白  
手夫渡桑乾河

汪仲翁字豐玉號招石秀水人

孟翁弟乾隆甲子舉人

送祐坡之陽山

穆湖詩人識面乍半載酒笠詩瓢同涼風忽動千里思告我  
欲去東官東陽山於古號末土兩歲鶴宦吟韓公石磯嘉樹  
致可樂對客反說天下窮阿兄試宰綬方墨阿母就養顏方  
童蠻人船搖鷗鵠唱天教看盡蠻花紅大嶺小嶺擾關吏上  
灘下灘愁窩工却數到日梅大放須知異地春先融橫榔滿  
林山滿屋書臺舊址恢千弓寢興尚避瘴母瘴志乘庶記雄  
田雄三三共奈花徑冷六六勿放魚書空憲勢竹上題句徧  
紫鳳芝房譜鴟風

夏夜小方壺同蘿石豫堂先生厚石作

梅雨乍歇梅風微桐花遠庭作雪飛四三冷伴擁深夕都是  
去年花下客花開花謝曾幾時花應笑人忙未知酒力詩懷

兩無奈等閒負此分燈坐簟紋扇影涼與親秋風彈指成前  
因早蟬珍重催斜日警我勞心聲第一鏡光十里涵新荷湖  
船並坐欹側過通暑僧寮會應再夢魂已越孤山背

九月十日作重陽同蘿石厚石賦

秋光未算負良期猶有零星菊在籬故事頗譜唐代展化工  
翻笑放翁遲敗梧葉省中庭墜肥蟹螯宜左手持邂逅燈前  
涼影聚醉餘袖綴昨宵詩

聞柘坡歿於京師哭之次豫堂先生韻

待詔虛聞有薦雄略然榮落任天公計來何止轉三日慟絕  
眞成裂五中瀕死神明應不喪此生魂夢倘常通遺書零落  
憑人寄未必秋尙電轍空

觀鈞

彎碕漲綠蓑衣濕醉者垂綸竟有餘莫笑凭闌袖雙手平生  
只解釣鱗魚

過藜迂先生紫雲村

福地秋蕭爽伊人抱膝眼巖阿廣招隱枕簟小游仙瓦蓋園  
香祖紗窗覆綠天几蘧端可傲我亦暢幽情

趙北口

鶼鷀已乳桃將萼易酒多次不醉儂愧煞赤欄橋外水三年  
兩度照塵容

吳慶章字序皇城靜庵長興人乾隆壬申舉人

玉泉庵夜坐

頻年慣作無家客今日真爲行脚僧獨坐空山人語寂半袈裟  
裝地一龕燈

傅學沈字太冲號莫菴又號拙瓢諸暨

諸暨縣志學沈博學好古尤喜爲詩其族人王鑑序其

集曰懸不傷廉健不流肆生平著述于載籍少所發明

乃條舉心得分經史集

類名三卷曰游衍錄

越風莫菴博學工文著述甚富乙卯秋閱已擬元數日  
主司得他卷欲置第二房考某孰不可曰與遲之以俟  
異日因改副榜首越十八年果領解年已六十有一  
兩赴禮闈不售詩格清麗若暢在開元大歷之間

### 柯山七星巖

通川抱孤岑絕壁揭星宿懸崖古松檜欲脫復中畱窮窕  
銅深崩芳石骨瘦墮樵下斷澗伏流響暗質細草含古香風  
篁晦晴晝丁字深數舍仰視若囊覆空穴來天風晴窗滴簷  
浦何年勢鬼斧來此斲靈鷲頽攜一卷書閉關長枕漱

### 長沙老人行

長沙老人七十九白髮星星未衰朽腰繫青銅三百錢日向

街頭沽美酒自言本是金陵人漁船作業常苦辛打槳每經  
桃葉渡賣魚時過石頭城有時北風動地起漁船却在江心  
裏出沒洪濤命似絲歸來把酒重歡喜前年落拓入長沙洞  
庭喬口便爲家夜看湘妃踏明月晝聞商女彈琵琶水邊自  
見顏色衰日日蒲萄添幾杯今年此船還屬我明年此船屬  
阿誰我對老人深太息知君不是漁船客一語分明喚醉人  
十年悔不參禪席劉伶參軍李青蓮呼取樽前費十千總死亦  
得稱神仙君不見漢武甘泉酒不老茂陵依舊青青草

遊五洩山

閻峯突兀撐青空蜿蜒東走如游龍兒孫羅列天柱聳朱霞  
倒捲蓬萊宮噴雲滯霧足光怪奇花異石紛青紅巉巖洞穴  
斷鬼斧疑有蛟蜃蟠其中垂天瀑布三百丈世惟廬岳餘難

同我來正逢秋杪節森森陰壑生清風赤葉踏翻啼猿谷老  
樹僵斷棲鶴峯捫蘿直視毛髮凜十洲雲路迷西東平生倦  
眼快一試勝攜長劒登崆峒夜深雲臥共禪榻星月皎皎穿  
梧桐

劉鳴鶯宅聽鄭五彈琵琶歌

檀槽鐵撥絃激楚崑崙摩詰傳遺譜古調淪亡數百年不信  
江南有鄭五鄭生本是姑蘇人雪膚花貌當青春手抱琵琶  
往京邸一時聲動長安城東華門外劉侯宅徵歌選勝都人  
識喚取花前一再彈淚珠拋落青衫客初作窗前風雨聲蕭  
蕭颯颯難爲情一陣兩陣鴈驚落三更四更狼夜鳴倏忽寒  
聲動刁斗刀劍相摩轂相扣天上雪後馬頻嘶瀚海戰餘兵  
亂走銀甲深挑復橫勒散啼逆落瞿塘石戍角三催寒鼓急

砉然一聲飛霹靂此時燈暗月沈沈不見星河惟露滴鄭生  
何從得此藝信手揮絃了不異聞說先朝小忽雷無乃身是  
中丞裔宮槐露冷日初黃照見離人雙鬢霜彩筆不靈身萬  
里滻河便是博陽江

長沙旅懷

宋玉祠前路江沙射日黃天連岳陽水樹壓洞庭霜往事悲  
魚腹前程滯馬當遙憐故園柳風外不成行

秋懷

苦竹籬邊漫一樽酒徒散後月黃昏冰霜有信先催柳砧杵  
無風亦到門三黜已甘貧士節一飧猶記故人恩十年欲把  
冠纓濯祇覺滄浪水尙渾

寄余蘿村先生

當年一鐸領諸生八尺龜趺舊有名老去幸無婚嫁累夢回  
猶記管絃聲到門剡水常廻棹接面爐峯半遶城知是蒲輪  
還有約申公名在漢西京

孤亭

孤亭面秋水落日一登臨顧此滄浪色難爲遲暮心疾風吹  
鴈急霜葉抱蟬深渺渺蒹葭遠伊人何處尋

西湖

落花如雪柳如煙二月西湖水接天江上樓臺連化國鏡中  
鶯燕管流年西陵古木滄波外南渡遺宮落照前只有孤山  
山下路裙腰芳草歲芊芊

早梅

漏洩春風第一枝暗香不使早鶯知笑他此後閒花草只逐

風和日暖時

姜炳璋

字石貞一字席珍號白巖象山人乾隆甲戌進士官石泉知縣著尊鄉集

朱文藻

曰雷翠庭學使按寧郡試諸生以兩漢總論炳璋接筆抒二千餘言多所發明學使刻入試讀辨真卷中浙東西

徧傳誦之

再過錢司寇祠兼憶張司馬司馬被執南田各官餞於

此祠

有明三百年之盡忠司寇開其始司馬收其終有明三百年之學案司馬以苦節司寇以苦諫憶昔司馬起行時衣冠再拜司寇祠合城官府望威儀里老至今能言之我曾拜讀司馬集司馬遺文不存一作志幸有黃南山南山簡要志載公坦腹事甚悉後爲楊誠之所刪遂致周文穆之疑墓碑恨少梨洲筆梨洲有張司馬墓碑吁嗟忠義聚吾鄉前有錢公後有張白石山青雨水蒼司寇號白石山人司馬號蒼水黃魚

正熟白蟹香我欲建祠祀二公十羹一杯永蒸嘗

陶章煥

字石湖號秋佳又號菊坡會稽貢生著秋佳詩存

陶氏家譜章煥工書善飲作行草雖小如蠅必懸其腕

飲醉輒大笑崇論闊議驚其座人自幼通聲韻學初學

幼南後參玉局其在荆襄有句云雲外烟鬟

堯二女江邊香草楚三閭一時膾炙人口

鳬亭詩話先菊坡兄標母墳云人間豈少王孫輩難起

千秋隻眼看與江陰翁渺夫照土甘餓死今還有文識

英雄古所無同一感慨

大雨至十七日始霽

積靄清於掃晴鳩聒樹間風高能散暑雲起不連山隔巷猶喧  
屐聞庭且閉關偶從午枕上得句一開顏

雪夜渡湖訪恬上人

夕風兼雪峭稜稜漸灑篷窗冷露凝一片渺茫南岸水數星  
明滅裏湖燈鐘傳法界諸天上人在孤山第幾層巖北梅花

開也未先將消息問雛僧

宿雲棲寺

江岸風生日影殘籃輿穿竹路漫漫殿前雲氣諸天近屋角  
泉聲六月寒夕咽不喧嚴戒律曉鐘纔動進堂殞連宵雨阻  
遊山屐借得傳燈舊錄看

偕蔣八理元汪大劖潭重游王氏園林

醉臥花陰憶往年紫藤架底藥欄邊豈知郭外無多路便是  
仙源小有天塵眼每煩雲洗濯風襟嘗爲樹畱連竹香鳥夢  
西堂句欲付黃筌畫筆傳舍弟箕村遊王園有竹香圖  
鳥夢人影過潭心句最佳

岳陽樓

獨上層樓望眼舒更逢今日雨晴初湖吞遠水天容展浪打  
孤城地軸虛雲外烟鬟堯二女浦邊芳草楚三間寒沙不少

衡陽鴈憑寄鄉園萬里書

九日姚思潛表兄楊建夏公子王大桐源同登蓬萊閣  
傑閣摩雲勢欲翔下臨溟渤控遐方島中樹帶炊烟白潮後  
天兼海氣黃孤劍防身將獨往三山畱我過重陽今朝良會  
誠難再把蓋西風送鴈行

泰安山中早發

濃睡方酣嫋聽雞攬衣夢裏眼猶迷平沙殘雪餘鴻爪斷澗  
浮冰割馬蹄日色挾風迎面冷烟光衡水抹林低垂鞭屈指  
經行處彷彿嵩陽少室西

戴聖芳

字蓮遠號蓮圃浦江恩  
貢生著蕙圃詩文集

戴聖芳字蓮遠號蓮圃浦江恩  
性方嚴勤遵禮法讀書講明大義尤邃於易年逾七旬早夜手不離卷兀不倦  
家文藻俱美劍溪先生見其一門友愛稔知贊  
其間志生積學敦行至今累葉簪纓洵符積德之報

望九靈山

九靈何縹渺白雲冠丹岑中峯起寒霧絕頂生層陰山人去  
已久跋步難招尋長歌向鶯鶴坐石彌素琴天風忽下吹動  
我巖壑心攏之不可卽颯然灑清襟何當追高躅遺世抽塵  
簪

時興詩

宿雲原上來薄霧川前合鳥散平疇陰農歸麥隴夕遙峯澹  
晴靄密樹橫疎碧浥露引餘圓汲井尋新脉洗性隔靄深抱  
沖齋欣戚徙倚慙幽踪歸去從所適

游崇因寺

萬竿脩竹十方無約我清遊待茲芻隔懨已看青燈匝入林  
邃染綠髭鬚花因說法當空散酒爲題詩破戒沽坐久渾忘

歸去懶沿溪山色晚模糊

秋夜獨坐

靜夜臨前軒清光何炯炯白雲搖空扉西窗颯風影秋聲  
山來涼意忽在寢羣動寂以息默坐發深警獨鶴凌高天遠  
意託松頂

山房卽事

澄坐那知夏日長山中歌詠有裴王雲生竹墅琴尊綠風引  
花枝薛荔香放鶴閒情傳逸客觀魚樂意在濠梁幽居恍入  
清涼界不惹紅塵到曲房

鄭虎文

字炳也秀水人世元子乾隆壬戌進士官至質善著香松閣集

嘉興府志虎文由裾修出典河南鄉試督湖廣廣東學政歷左贊善歸杭書院於學庭不通商文兼取業改監考官主後杭州學府不遺孤獨力養母病辟于神壽減算界母果長無遺美少孤竭力養母母病辟于神壽減算界母果無所倚事兄如父撫諸姪如子分衣共爨五十年

如一日素以經濟自負嘗願爲知縣謂縣令切近民易  
知民間疾苦一令賢則一縣治天下之令賢則天下治  
人以爲名言著存松閣詩文集李子師雅讀甚過目了  
了而其意邈然視文字若糟粕者十五舉於鄉十七天

### 北征別

野桃綴輕紅溪柳吐新綠去去從此辭行行重躑躅上堂拜  
阿母阿母淚盈掬舉手望北指哽咽聲斷續江河浪湧天灰  
沙昏兩目鞍馬素未習孤征况無僕若壁蠅伺人冬炕煤有  
毒晨夕誰扶持勞勞水與陸人海苦支離驃驃強馳逐矧茲  
帝皇都人情異寒燠無若居鄉里骯髒少譖俗事事須在心  
瑣屑難盡囑吾老尚窮健毋爲亂心曲況有汝兄嫂足慰形  
影獨只汝身在客羈旅誰顧復迢迢路千里異地安可繙別  
後知何如魂夢遠相屬攜手重叮婢音書莫辭數遊子再拜  
受無語整輿幅慘慘望北行春風吹櫟木

雨潤軒集

卷二十一

卽事

半捲蝦鬚湯玉鉤蕭閒景物一庭幽  
滴池得雨青浮面荒草無人綠到秋落葉亂驚歸鳥疾薄羅輕趁晚風柔望中無限飛鴻影立畫斜陽不轉頭

呈博也義上兩兄

十五年來興已闢先子過伯父盛湖草堂家庭詩酒之會舊每一舉彌月物後垂十五年不復舉矣舊遊重此續前歡弟兄無恙貧原樂骨肉多艱聚亦難月落河干魂不渡謂合水五兒秋生海國客先寒及申兄近死真已矣生客閑中

長別莫把相逢容易看

憶家孟袁浦未回

月照霞江雁影單何人爲念客中寒孤雲無族思歸岫老馬迷途未解鞍望我能來真殘似春初余擬北上約相見于袁浦兄待久不至屢以札詢

恩君不見又秋殘一一番風雨重陽近愁絕茱萸獨自看

趙孝子

有序

趙孝子名如勤燕定州東馬村人年十四父爲同族宋實簡三人所殺姪某首訟宋宋賄簡承簡坐死姪某亦坐誣得罪釋宋及實未幾會赦赦簡出母某氏時泣語孝子孝子誓必報會母老弟幼不可死因僞與宋結廕十有五載母歿且服闋矣爲弟畢娶旣畢之五日適宋出觀劇孝子腰斧與俱卽其後而擊之遂殺宋時乾隆十一年丙寅七月二十三日也孝子旣殺宋詣吏請死吏不爲白坐辟獄成上聞下所司比部袁君德達閱案知孝子無死法倣古駁復  
譽議上之

制曰甚是敕下有司覆案定擬嗚呼而今而後孝子可以無死矣夫孝子死孝子當必無恨顧

君如堯舜臣有皋陶而下猶有孝子而死者猶有爲吏而死孝子者其如天下後世何因歌以紀其事

趙孝子定州東馮細民耳生不讀書不識字父死兒年纔四天荒地老寃莫伸嗚冤坐誣兄鬼薪脅從者簡首宋寶宋賈賄脫簡罪辟簡罪未辟赦且釋死父含冤生母泣泣顧幼子呼如動汝族宋實殺汝親汝弟幼弱惟汝身我今語汝知惟汝識之汝報之報之以死兒何辭兒待終母天年時母亡弟長弟授室越弟授室纔五日乾隆丙寅七月二十三日日之夕東馮村人夜觀劇伺宋得隙覘宋出別墓辭家躡其跡腰間利斧光差差如霜似電驚蛟螭精誠泮膚血淚滋一十

五載神爲持歸途陡逼格其肘腰間出斧斧在手力不敵宋  
宋欲走蹶而復起斷其首大呼復讎須眉張口月慘淡天昏  
黃狂颺動地沙礫亂若有神助非身強鳴呼兮孝子今無其  
人古有此兒童聚觀老翁歎頃刻喧傳遍鄉里束身到官官  
不問謂爾殺人罪宜死爰書具獄文下部司命刑曹赫然怒  
駁議上

帝曰兪死未可知生有路於戲我

皇盛德如天仁孝子不死萬物春孝子不死萬物春於戲我  
皇盛德如天仁

寄家孟

長物空憐出有車座中有客歎無魚若論況味將何似恐較  
鄉園或未如幼子近尤能善飯孤甥今已畧知書算來兩事

差堪慰消息殷勤寄草廬

寄姪兆龍

佛書負米計何從念汝慈親老更窮耳病那堪聞鬪蠟手鉤應已罷丸能飢銜竹竇啼三鳳夢醒蘆花送遠鴻此境只子經歷慣不禁雙淚灑西風

家六姊寄示四十自壽詩次呈

掉頭辭故鄉轉眼如昨日辛勤赴窮官睽離感天秩幼記牽  
姊衣長共綰娘膝衣綰煩裁縫緋解索盥櫛响噭如枯鱗困  
此網罟密艱難幸成人竟爾手抱姪姊稱最少年四十慶逢  
吉重陽先萸筵九華進丹術離菊亦闌漫戶牖自充溢乃不  
忘家傳用敢以儉帥兩部息蛙吹五字嚴杜律如鶯語三三  
似珠穿一一雲鴻落鳴琴江峯冷湘瑟謝彼春前花穎此先

後實度幾善必昌莫嗟老誰卹姊詩畱此殘喘軀待老有誰卹蓋謂艱嗣也丹頰猶塗朱鬢髮尙凝漆徐麟夢豈虛潘輿暮堪必獨憐塵中人目昧亂鴻乙照我月團團吹我風慄慄已念骨肉歡過隙等箭疾况復迫季冬瑣屑愁未畢寒更不成眠呵手拈凍筆

偶成

頻煩敝帚掃氛埃紙帳蘆簾不敢開野犬入扉驚客至鄰雞隔屋趁羣來坐陳俎豆兒同戲出典釵環僕未回笑指珠璣誇德耀昨宵呵凍句新裁

自題夢遊吞松閣圖

有序

余少時嘗夢行萬山中凌絕頂頂無雜樹多松松徑翼然而出者如亭然顏曰吞松閣字奇語創殆不可晚俯視斜日松陰滿庭恍然若有所會遂驚寤越數

年洞庭周笠寫圖又數年復自題其圖云

君不見虬龍盤石根半枯寒濤颯秋風呼青牛白犬互隱見淋漓元氣神爲扶手摩松枝口嚼寶縱不作神仙爲徒憐余怪懸木同病擁腫合入天台圖一朝神遊動魂魄飛意直入排清都兜羅下界俯一氣峯盤萬仞松千株松間有徑徑甚紆蟻行曲折同穿珠松迴徑盡勢絕殊懸崖挂石相枝梧翼然飛閣凌浮屠重軒三階室四隅反宇上出觚棱觚字排銀榜銜高梓體不類古今尤無納光激影松在地老蛟欲舞寒雲鋪吞松之意無乃是以指畫壯兼心摹維時視日正晡瞿風吹我行天衢重岡複嶺鼯鳥趨脚踏鶴背煙模糊翻身一覺聞啼鳥鳥啼月落清影失彷彿記憶存形模形模在晝渺難入夢亦幻境非真吾何當杖策果此願汗漫八極遊

蓬壺不然一棹歸西湖萬松嶺畔孤山孤惜未得遂成已徂  
或云事與丁公符十八年後其公乎公乎公乎非我志作詩  
敬謝五大夫

送同年周檢討芝山出宰寧武

四海雙愁鬢三年兩客身未歸猶戀飽好去莫辭貧寒日雲  
先凍窮荒草不春一聞行計迫作惡已兼旬

廉吏談何易貧家累恐深未妨塵在榻莫負水爲心花露沾  
庭鵠松風動匣琴政成如報績吾欲問棠陰

送姪謙之寧武幕

朔風忽吹面使我心骨酸汝今邇風去何以庇汝寒不能爲  
汝謀新製羅與紈解我身上裏脫我頭上冠冠裘我所御十  
年鮮堅完舉以被汝體驅車赴窮邊窮邊豈辭遠獨客衣裳

單衣單亦不慮嚴霜歲將闌念之不能寐揚焉搘心肝  
隻身走千里意若有所圖今果成此行底幾口可餽向我忽  
不樂涕淚相滂沱非調慘行色終恐迷歸途汝耶沒三年未  
卜土一區汝母老且病望眼空模糊哭斂去鄉國骨肉惟我  
俱別我復遠適疾痛誰與呼天乎愧汝叔使汝身羈孤

窮官不相活送汝之西陲豈不念行役願汝有所爲寧武雖  
小邑民社咸在茲此中足經濟求之有餘師官舍實入海籠  
辱爭毫釐舉動互窺伺賢愚相瑕疵苟不愧衾影安足憂譏  
嗤和衷乃集事止謗惟無私千里始跬步畢生此其基

小小不努力老大徒風塵一身不自主去住由他人此境我  
曾歷視汝尤艱辛汝幸得賢主與我骨肉親羸條固非望足  
以安汝身念汝初入世野馬驕不馴勿如在家時勤爲俗所

嗔直釣不釣魚炙轂無方輪丁寧別時語願汝書諸紳

歲暮雜咏

日月不可駐蹉跎髮屢新逋從今歲積人似去年貧有客思燒兒曹生久病未愈無錢欲論神依然聞社鼓萬戶太平春

陋巷春難到貧家事久譖大飢凜似鶴婢冷縮如蠶嬌女衣更著痴兒髮不簪昨宵渾不寐敗葉戰風酣

近接淮南信家兄館淮上蠅頭十指書只言歸未得不敢問其餘活計輸倉鼠生涯指磨驢幾時同一飽風雪臥荒廬

耘雅堂前月家六姊梅花溼上春家大姊三年勞夢寐雙淚落風塵歲歉難爲婦愁多老却人小樓燈火夜念及每驚神

獨客雁門去謂自牧姪殘年事可知應爲痴叔慮直作故鄉思骨肉夢中夢關山歧路歧此行如得當未敢望歸期

嫋嫋亦已老家五姊諸孤況更痴無家甥似舅失學母兼師婚嫁頹年近飢寒繫我思愁腸與落葉如雪亂斯時

師吾草堂小集卽席分賦

汪家探花園俊髦溫其如玉醇如醪忽先六日招登高招我六客皆同袍聯翩走馬城南壠蘆花瑟瑟風騷騷就中髮僧興更豪拈花喜談禪叔山歲呼爲髮僧詩思湧若秋江濤有技欲試癢莫搔不肯獨作嚴分曹徵詩刻日如追逃色難衆賓語不囂咱我許設重陽饌嗟余方輪不轉膏下筆點鼠防嘲嘈那能更學寒蛩號鶯生四脚蟹兩螯或者此事宜老餐鴻辭軒出鴈解絳偷閒約赴東籬陶門遠紅蓼徑掩蒿宛移秋色來亭皋賓從雜坐花局迺提壺撥甕傾葡萄隋珠和璧人各操探懷出手調雲璈傳觀五讀口目勞難以諧謔貶或褒清言絡繹獨

繭須臾月出明秋毫晚鐘一聲催  
蒲牢童僕背憎心忉忉  
拳身立寐如懸猱嗚呼此樂毋乃慆  
歸兮雷動車速鑪大驚

寒巷聲噭噭

歲首同人小集有感

已出山泉旣泮冰漂流踪跡故難憑恰看歲首人何在但覺  
尊前醉不能萬里關河同夜雪百年身世感春燈當筵幾度  
傷離別鏡裏潘毛白漸增

中秋同人小集寓齋

明月如故人適我願無違故人似明月八室有餘輝有錢沽  
我酒無酒典我衣今此不爲樂恐爲來者嗤緬思小山桂故  
園正芳菲誰同花下酌空掩月中屏來雁鳴方急孤螢見已  
稀流光迅駒隙一往不受穢今年今夕好明月明朝非當杯

已入手不醉莫言歸

甲戌閏中和金海住先生懷友用聚奎堂壁間韻  
能來夜坐莫辭深燭影初搖月下臨有幾晨昏同燕笑無多  
朋舊已山林春歸上苑人常別身鎖重闌夢亦沈那更君詩  
如錦瑟一絃一柱愴離心

九月四日遺嫁莊女書此示之

汝祖故愛女而我尤過之有女無不愛愛汝情獨痴汝父故  
貧賤幼孤失瞻依伶仃幸成立倚汝祖母慈汝母歸我家操  
梅嗟後時一索乃得汝起臥親抱持辛勤十八年瑣屑難置  
思念汝十二三婉婉具令儀絰紉及澣濯枕席兼盤匜事事  
俱在心鉅細咸待治冬膚坼縱橫夏汗沾淋漓代母事操作  
勞瘁靡所辭梨棗有推諛出入無完衣東家有美女羅綺嬌

不支西鄰有少婦珠玉盈履綦富者相競鬪貧者相嗟谷汝  
視若無睹泊然不爲移頗能見其大竊負男子奇事我尤曲  
謹委折罔不宜如彼形與影轉側不忍離以茲遂成癖愛汝  
逾羣兒今歲次丁丑爲汝親結禱書堂作甥館賣犬爲奩資  
宜家自此始畢生乃其基庶克相夫子敬勸同賓師母忘我  
家訓相勗禮與詩吾聞古賢婦勸學斷機絲桓車及孟案往  
蹟汝所知卽今不共勉後悔良已遲知汝素賢淑安用相憂  
疑愛深慮彌遠反覆多繁詞嗟我年已暮冉冉霜入鬢今雖  
不遽別別亦須臾期念此不能語含毫淚先滋吟成漏欲盡  
四壁寒風吹

度磨石嶺觀雲海

黃山雲海世所傳曹圖洛<sub>上</sub>禮學<sub>有圖</sub>潘記<sub>稿堂先生有觀歸愚篇</sub>黃山雲海記

沈尚書有

觀雲海詩昔常披玩不忍舍懷此不到空年年今來楚南度

摩石如石磨磨折且旋枯蠅升壁蟻出穴高凌碧落卑重淵  
悄然坐我三十六峯頂俯視下界兜羅縵維雲觸石膚寸起  
滯痕輕素飄炊煙初升一縷合萬族漸彌罅隙無旁邊當其  
欲合未合間百重樹杪噴薄無聲有形之飛泉分流互注各  
有態虛空欲碎難雕鏘遲來惜我未見此但見浩浩一氣相  
盤聯幻參雲水寓色相妙兼雪月爭幽妍恍疑一拳坐一葉  
斷查銀漢浮張騫還疑岳陽喚未醒神遊赤岸君山巔或云  
天羞夜郎洗陋俗綏寧志云古夜郎地天吳海若紛聯闢不然夸娥負  
山送我北海之北南海南罷風鼓鼈聞成連盪摩星日墮查  
杳平夷凹凸歸平平就中忽露雙峯尖光明搖漾青螺圓與  
之低昂波下上俄然近遠風便娟瀛洲方丈此或然不爾胡

得空中懸吾聞乾坤大物山與海表蘊真窮言詮惟山有  
海海有市變滅諸相眞虛元代傳其說見者少況我過客尤  
難焉登州海市禱乃見侈神報豐天哀憐不祈而獲我何德  
重是

帝命司文權與蘇殊遇遇差勝可無健筆追坡仙坡仙往矣  
不復作詩成未擬投時賢時賢自有黃山在那識渠陽別有  
天

庚辰除夕同人讌集

雅驚列炬啓長筵未必團樂遙往年舊巷郎君多羯末後堂  
弟子得崇宣春融杯氣驅文藻雨點檐聲當管絃豈獨鄉音  
誇有伴醉眠吾欲儼坡仙

將軍山

山含春雲青石露虬骨瘦倚空有孤撐跨波得虛覆壁削平  
孰磨碑坼碎如湊初疑女媧遺采陳彌缺漏又疑石髓流風  
凝出皴皺問名訝將軍侔象殊甲冑苔蘚偶作緣土壤不敢  
垢樹古蟠蛟螭屏展界紋繡上枝蔽危峰下根貫陰窓高宜  
致仙禽險不隱怪獸探岳遲巨觀循江副奇觀去舟泊中宵  
迴榜覲晴晝酬此隔歲心如有十年舊摩崖欲題名迅帆促  
歸浦遊屐空遲迴山靈笑凡陋

寄師亮

避濕緣憂疾先余竟得歸一江春水駛萬里白雲飛乍上南  
湖棹初穿密線衣殷勤問腰帶別後瘦還肥  
到及清明候多應間墓田將余垂老淚寄爾灑重泉極目五  
千里迴頭二十年含飴弄孫事永斷此生緣

張觀察招集晚紅堂賞藤花次日趙中翰損之長句見示卽用其韻示觀察

庭羅雀門少題鳳如兔鑿穴融逃縫叩關有客約看花破爛扶衰趨闈空入門天矯龍蛇盤紫貝明珠壓檐重主人辛苦費三年汲井疏泥勞灌壅博得花時一笑歡痛飲高歌意飛動前遊彷彿記瀟湘舊宅披尋懷庾宋官舍頻開北海樽大人曾入劉伶頌轉眼君歸我亦還白首紅塵尙隨衆自慚不及紫藤花欲借扶持怕嘲弄秋風擬土天隨舟余決於今  
秋告歸雪圃常依漢陰甞明年此會復何人斜日晚紅留宿夢爲霖願被浙東西却埽松棚迓驕從

次煙焯兩姪久雨聯句原韻示姪鼎師尙兒子師亮師

雍

一雨浹兩旬柴門斷行客尋常一面難咫尺千里隔詩來映  
窗讀餘明黯將夕老眼開昏花聞樂嘆繚情知春草深才  
許石鼎敵嗟余故老辱廢置如舊歷蕭索愁菰蒲峭蒨慚竹  
柏久聞唾壺歌倦和櫓溜滴忽彼連璧吟孚尹照肝膈和音  
叶墳篪同氣投芥珀一字價可千斗酒詩難百機雲在上頭  
軾轍誰接席迴頭看兩兒屬和稿屢易阿鼎過江來初脫雨  
中屐見猶亦心喜拔轍馳趙壁相約抗兩雄作計消此夕老  
夫興亦豪病眼輕一擲敲鉢聲嫌遲又手韻交迫詩成互傳  
觀辨圓紛得失尚也非秦人如視越肥瘠投之以夜光畧不  
一動色袖手恥張軍閉口疑杜德十月稻未收四望雲尚墨  
文字腹可撐輒憚民豈莫殘年憂桂珠誰術擅黃白余聞顧  
而笑此境已慣歷因之廢吾詩此日良可惜

贈金陵岳水軒

君家倦翁住鴛鴦水蠡湖小築開金陀平泉花木正顏色洛陽  
仙客悲銅駝滄桑人代不計歲子姓散落埋煙蘿水軒先生  
名德後振景拔俗昌聲歌壁經家書困離校劉畧班藝供搜  
羅張融船牽桃葉渡米家舫泊秦淮河吟鞭慣折白門柳弄  
筆時換山陰舊後先名流相輩出燈若星宿尊羲娥那知才  
高不入俗蔡琰下玉遭譏訶鵠中礪硯何處吐酒杯好借休  
嫌它去作諸侯老賓客一笑腐鼠真么麼代庖聊試宰國手  
見獵不動古井波將軍揖客差自許廷尉結襪何足多江山  
有情展遊眺歲月無意消吟哦卽今行年已七十方瞳炯炯  
朱顏酡倦遊思歸益好事欲裒著述窮編摩新安使君招與  
共荆襄一葉投龍棲如古乞守得鄉郡黃山白岳爲行窩嗟

余客此耕研石荒山鍵戶無人過初交幔亭繼吾子文追建  
安詩元和頗揩病眼盥手誦掃除風疾降愁魔獨憐衰病才  
力弱無足取重如君何忝君先世共鄉里勸君何不歸嘉禾  
楊柳之灣倦翁圃亭猶有竹池有荷倘君來宅吾終隱對關  
二老眠雞窠

贈儀徵汪秀才中

直鈎不釣魚方軌不炙轂卽物具通識遇合以我卜往蹇悔  
乃遲慎始保初服因不失其親乖或乘大僇獨憐可宗者如  
玉噬碌碌所以獨行士果哉委溝瀆溝瀆良亦宜親老缺餧  
粥禮食權重輕回面聊自鬻呼則應馬牛與不恥諱疏準古  
奉檄歡斯意可歌哭自從秦漢來阡陌開井牧土鮮祿代耕  
求飽難半菽况士職且多夜光混魚目習輕厭衆譏奚辨鵠

與鷺只尺敵奇士泥塗困芻芻文也少孤貧此味嘗最熟君  
況差我同感我額頰感恭聞下

明詔遺書採幽谷經術首所崇激勸醒迷復君才應時須學  
也中有祿不干亦不矯吾道惟自淑方今歲將周梅蕊已簇  
簇春江待君歸天上舟行速

雲霧松歌

山松莫若黃山奇聞者未信見亦疑松不麗土戴之石松根  
絡石相交持風來撼之勢欲拔不膠而合終難離霞烘日炙  
雨少澤奚恃以養蒼然姿騰空奮起還偃伏盤根拓戟虬其  
枝千年一握鬱精氣參天怕使天公知黑入太陰白摧骨彼  
松視此真卑之不資灌溉謝培護而汝獨壽云何宜吾思黃  
山雲霧窟鼠鼠摩盤無休時元氣所化生氣足霏霏著物生

華滋引流汲井亦堪潤先後天異分醇疵況石土耳山作骨  
中有石髓如凝脂人得服者恒不死次亦往往登期頤松固  
得體育其本胚胎此實長生基雲蒸霧沐復天降一物共荷  
乾坤慈此中具有太極理狀之恥作雕蟲辭鳴呼松兮好自  
保出山容易根先移

戊戌二月二日到杭州崇文書院越二日雨又明日雪

登四賢祠樓望雪用東坡北臺韻

連朝寒雨正簾纖邀勒春光朔氣嚴亂放林花黏粉蝶畫雕  
山骨出形鹽沈沈雲影濃鋪濱皛皛湖光遠接簪南北竟來  
迷望眼插天不見兩峯尖

推窗千片落驚鴉老不禁寒鬪兩車未辦閒行披鶴氅早催  
清夢落梅花兜羅世界原同色粉本湖山信作家禮罷四賢

懸檻立北臺欲和手頻文

題趙功干先生遺照先生子一清余門下士亦已物故  
白鷗波浩蕩萬里誰能馴杜陵以自況惟君與之倫杜徑不  
復作君亦辭紅塵有子一清篤家學著述誇等身桑經與鄭注  
訂正稱功臣茲編貯廷閣身沒名干春往余與之密庭訓時  
復陳未遂紀羣好謬託孔李親今茲展遺照浪浪涕沾巾形  
容自存想須眉同此神如鷗沒不見萬里空前因

送姜壻貽續西遊謁其師畢中丞於西安

西征竟若祖生鞭山隔榛莽有夢牽分陝自來尊旦奭後堂  
何幸廁崇宣蒼生早入痾癱抱故舊看垂骨肉憐恩重師門  
須努力莫將姓氏辱名賢

葉佩蓀字丹穎號辛施歸安人乾隆甲戌進士歷官湖南布政使著傳經堂詩文集十二卷

正陽關

已入江南地，開頭望水關。  
孤舟清潁尾，疎雨壽春山。  
行路此身賤，謀生吾道艱。  
一聲柔櫓外，愧爾白鷗閒。

宿湛河田家

柳陌初歸翼，松扉暫解鞍。  
真從田父語，莫作使君看。  
窗斷璫蛛網，牀喧近鴨欄。  
羽書方夜急，棲息敢求安。

刺虎行贈邵將軍

南山獸盡老，狐匿飢虎下。  
山不擇食東郊十里，聞腥風白晝橫。  
行官道側城外居人欲遁逃，麾下壯士鳴弓刀。  
將軍叱咤拔稍起飛空，突出霜天高怒晴。  
百步當睽暘猛氣，已奪偃魂茶。  
握槊直前伏草驚，騰身一吼蒼崖裂。  
人強獸慾爭雌雄，馬倚人勇能跑空。  
火光迸落壁，熊碎錦毛血灑山牆。  
紅老烏驚

呼枯樹倒卷尾磨牙猶力拗砉然巨石摧青天惡膽剖出生  
人爪將軍廻策神閒暇謹聲四合爭迎迓仰視將軍俯睨虎  
此虎此人夢猶怕將軍昔年鎮朔方身領健兒皆材強槍竿  
嶺頭旌旆迴居庸關外碉弧張我將奉使長城北榆塞春風  
聽鳴鶯上谷西門一握手颯爽晴空見秋鵠移守中原玉帳  
清高齋數過醉談兵黃沙白翼南都曉猶是威名古北平

桐柏道中

柏子何年國蒼茫接楚邱村纔三戶聚族少百年畱計畝秧  
論石桐邑山田晴零不成項開山樹架樓尙憐生聚苦更忍  
急徵求

九日登吹臺

碧樹蕭森萬井秋郊關浩蕩此登樓百年已見霜侵鬢九日

何須菊滿頭落木聲從平地起長河波接大荒流登臨漫擬  
酬佳節翻遣憑高攬四愁

豐寧道中感賦

倦飛久已厭風埃絕塞高秋復此來鐵聚六州真鑄錯玉燒  
三日恐成灰馬嘶空磧寒燕盡鴈叫長天落木推雙鬢只今  
無可白不須搔首更生哀

送崔別駕龍見之任杭州

崔由順慶太守謫授

作郡何如佐郡恬單車好背朔風嚴有官暫屈岑公孝此地  
曾經蘇子瞻貧剩湖山堪自足閒容吏隱得相兼重煩問訊  
春堤柳待我歸來拂帽簷

臥龍岡謁武侯祠

抱膝長吟有所思崔徐一笑未應知隆中已決三分策谷口

猶勞六伐師業定高皇初創地身潛世祖中興基天教此義  
常畱在誰調炎精運祚移

將入都馬總戎建學鄭太守墍基偕涅陽湖陽安衆復  
陽鄼縣義陽丹水諸縣尹餞集于臥龍罰

蒼蒼古木俯平田竹外鳴鳩淨野煙遊屐重登懷古地離觴  
况及送春天坐深樹影交簷合日晚鐘聲出郭傳後夜一樽  
吟望處河橋官柳正吹綿

蔡璉字覺亭號蒙泉德清諸生

京口卽事

人影衝煙去嵐光撲面來江空先見雁客倦怕登臺白髮蕭  
颯亂黃花爛漫開渾如舟不繫關吏莫相猜  
月色當秋白山容入暮蒼也知身是葉轉笑客爲鄉支枕愁

無寐挑燈劍有鏹。頻年來往熟不覺，水天長。

兒子廷弼告歸於鶯山之麓。小築數椽，頽曰萬松草堂。體闡意也。落成之日，扶杖往觀，喜而賦此。附題於左。  
得得高峯聳翠螺，萬松層疊石盤陀。雲山有主應須我，風月無邊合倩他。地僻不嫌人跡少，心閒常覺此身多。回思九年來事，却悔臨岐喚柰何。

孔繼祥字抑齋蕭山諸生著寺麓山窗吟草

早泊漁浦

涼月猶掛樹，居人尚掩關。煙消漁浦岸，日上富春山。曉渡聞咿軋，遙峯露靄鬟。潮平風浪急，小艇泊前灣。

偶成

忽忽韶光老，苔痕點石斑。護花籬急補，待燕戶遲關。窗貯半

簾月樓橫一角山新詩吟未穩書就更重刪

陳汾

字晉陽號墨泉蕭山監生著怡園詩鈔

蕉窗銷夏錄墨泉資性恬淡吐屬有逸思如無事成佳日耽書娛小年白雲一夕臥流水五年心皆佳句也工書善畫其廬在蕭邑東郊蔭喬木環清流洒翰琴亭頗據林泉之勝顏曰怡園凡騷雅之士有過城東者輒訪之

寫雪窗待酒圖題句

朔風一夜鳴簷隙吹落天花積盈尺窗前失却舊山青只見遙空聳銀壁須咏千篇飲百壺呼童急向前郵沽天寒日暮行蹤絕不識溪橋有徑無

池亭閒坐

偶到虛亭坐身閒喜地偏雨餘低岸柳風定落池蓮無事成佳日耽書娛小年北窗堪一臥高枕自悠然

重游雲棲

忘却招提路歸雲暗自移客尋曾宿處僧話舊遊時林密秋  
生早峯高月到遲閒來坐禪舍續寫壁間詩

自昔別蘭若無時忘竹林白雲一夕臥流水五年心山翠添  
新雨風泉瀉舊音高峯仍未上何日更相尋

孫毓敏

字聖求一字  
號齊山陰人

曹乘鈞曰勉齋樂志田園讀書爲善築春山書塾延名  
師以課同族及鄉黨之佳子弟塾中林壑清幽因景綴  
詩具有伊洛風致

春山書塾雜咏

素馨廬

塾中南廬也叢蘭繞階雜以衆卉早春香祖菲菲如親君子

猗猗空谷蘭移滋寒林下不言而自芳凡卉失嬌姹乃知德  
異聲謐嫌同心寡

止水居

素馨廬從西轉北一泓鑿  
澈有止水焉卽以額額

余心如止水明淨本無塵物交乘後起毋乃混其真清池方  
渙渙常留天地春

雲影池

汎廣不半畝而源頭活水自之

一鑑清如許天光盪雲影源頭活水來涓涓寒流靜默會晦

翁吟臨池發深省

書畫舫

池上岸舫臨波倒影彷彿米家書畫船秋夜遲月尤妙

藏書餘萬卷傍池擣十笏杯水覆坳堂芥舟坐超忽彷彿米  
家船推窗納湖月

叢桂軒

軒在獅子巖南環植金粟非慕小山招隱也底幾肆業者折取一枝蟾宮不遠耳

雲外飄天香翹首廣寒府軒墀繞叢桂一枝憑折取寄語青  
雲人安用吳剛斧

鶴和堂

叢桂軒北有堂顏曰鶴和義取中孚同德相應以爲學者最

秩秩登斯堂鶴鳴欣有和心以同德孚在隱聲早播終與鸞

鶴羣寧誇燕雀賀

柏屏

堂前古柏一樹橫亘山腰霜皮黛色益數百年物也

老幹攫蚪龍歲寒標晚節天然列畫屏蒼翠濃於織悅與君子交古道照顏色